

PROTOCOL FAT BUN DA LA RADUNANZA CUMÜNALA DALS 4 LÜGL 2012

Protocol no. 2 Radunanza cumünala dals 1. mai 2012, 20.15 – 22.00

Preschaintas: 25 personas

Il capo bivgnainta las votantas ed ils votants ma impustüt eir a lic. iur. Not Carl sco referent versà per la seguonda tractanda. Il capo til ingrazcha ouravant ch'el s'ha declerà pront d'orientar a las votantas ed als votants da Sent a regard la "Rait Engiadina" respectivmaing "Energia Engiadina" co cha la società vess d'avair nom a la fin finala.

Il capo constata cha la radunanza saja gnüda convochada in basa a nossa constituziun cumünala e dumonda sch'inchün haja da far objecziuns. Sainza chi vegnan fattas objecziuns e sainza chi vegnan nominats scrutinadurs vain inchaminà a la prüma tractanda:

Protocols:

Il protocol no. 1 da la radunanza dals 12 avrigl 2012 vain prelet. xxxxxxxxxxxx giavüscha cha seis votum vegna cità cun agiundscher seis nom. Sainza chi vegnan fattas otras correcturas vain il protocol approvà.

In connex cul protocol prelet aintra ün'objecziun a regard il votum cità da xxxxxxxxxxxx. L'antierur capo xxxxxxxxxxxx giavüscha cha las votantas ed ils votants piglian a cogniziun la seguainta posiziun ch'el ha sün giavüsch dal capo dat giò in scrit: "*La Posta ha trattà cun l'antierur Cussagl cumünal l'avegnir da la posta Sent ed ha decis autonom da tilla müdar in ün'agenzia postala. L'antierur Cussagl cumünal ha confermà in scrit da nu far recuors cunter quella decisiun, per pudair preschantar a la populaziun il proget "Agenzia postala cumbinà cul büro turistic dal TESSVM i'l stabilimaint existent da la posta". Il Cussagl cumünal antierur es persvas cha quai saja stat plainamaing in sia cumpetenzza e refüsa perquai l'imbüttamaint fat illa radunanza dals 12 avrigl 2012.*"

1 86 PROVEDIMAINTE ELECTRIC **„Rait Engiadina“ respectivmaing nouv „Energia Engiadina“**

Il capo declerà ch'el saja fich cuntaint da pudair laschar referir ad üna persuna cumpetenta sur da quist tema complex e surdà il pled a lic. iur. Not Carl chi ha preparà per quista radunanza d'orientaziun üna preschantaziun da Power Point.

Ouravant tuot spiega Not Carl la situaziun da partenza culla fundaziun da la Corporaziun dals cumüns concessiunaris da la Ouvres Electricas d'Engiadina (CCC OEE) chi ha l'incumbenza da mantgnair ils interess dals cumüns concessiunaris vers terzas personas, da tour per mans tanter oter la repartiziun dals fits d'aua e da las furniziuns d'energia, da realisar las controllas d'installaziun prescrittas sco eir da pisserar pels quintadurs e per las masüraziuns.

Lura dà Not Carl üna cuorta survista sur dal pedsch per la forza electrica ch'id es per nossa regiun ourdvar favuraivel grazcha l'agir prudaint e capabel da la CCC chi ha ragiunt ün contract unic cun las Ouvres electricas d'Engiadina.

In seguit spiega Not Carl co cha la situaziun s'ha sviluppada davò la liberaziun dal marchà d'energia, ün fat chi ha gnü per consequenza cha las ledschas federalas sun gnüdas adattadas da maniera cha la lavur administrativa es dvantada vi plü cumplichada ed extaisa. Ün ulterier factur chi fa dvantar l'andamaint plü difficil e complex es il fat cha divers cumüns han fabricchà agens implants chi procuran la rait cun forza electrica. Hoz sun avantman 45 ouvres aint il territori da la CCC.

In tschercha da structuradas plü simplas e survisiblas es nada l'idea da fuondar üna società da dret public chi ha sco mera d'unir las raits electricas dals cumüns suot ün tet per pudair spordscher ün andamaint plü efficiant, plü professional ed a la fin eir plü economic. La società es fabricada sù analog ad üna società d'acziaris cun cussagl administrativ, direcziun e post da revisiun, be invezza da la radunanza d'acziunaris vain convocada la radunanza dals proprietaris illa quala sun rapreschantats tuot ils commembers egualmaing cun duos rapreschantants e quai independent da la valur da l'infrastructura electrica chi vain portata illa società. Uriuntamaing vaiva la società nom "Rait Engiadina", ma grazcha a la decisiun dal cumün da Scuol chi nu portess illa società be la valur da l'infrastructura electrica d'impersè eir amo la valur da la firma "Energia Engiadina", po la società surtour gratuitamaing il nom "Energia Engiadina".

Per finir declera Not Carl cha cun d'unir las raits cumünalas cun integraziun da la firma chi lavura fingià daspö ons sün quist sector e ch'id es abla d'organisar la gestiun as possa raggiundscher l'optimum per noss cumüns, nempè efficienza administrativa ed economica cun ün andamaint professional, sainza perder las cumpetenzas autonomas.

Il schef d'energia ingrazcha a Not Carl per sias spiegaziuns detagliadas e cumpetentas e declera cha tenor il Cussagl cumünal saja quist la dretta via pel cumün da Sent. Uschè sun ils cliaints al glistess mumaint eir ils proprietaris e la controlla sur da l'andamaint es cun quai sgürada. Implü crouda uschea davent la dependenza da la firma Energia Engiadina causa cha quella es lura part da la società e tocca cun quai a tuot ils proprietaris.

Il capo da liber la discussiun:

Sün dumonda d'üna votanta da chi chi vegna lura fixà il predsche per la forza electrica pel consumaint respuoda Not Carl cha'l predsche da basa pel transport stopcha cuvernar ils cuosts e vegna fixà da la società EE e fat bun da l'Elcom. Implü vain pro amo il predsche per l'energia svesa. Mincha cumün po però decider autonom sch'el vuol sbassar cun üna part da las entradas dals fits d'aua o da la vendita d'energia il predsche da la forza electrica pel consumaint.

Ün votant vules savair scha la giunta da la EE saja identica cun quella da la CCC OEE. Not Carl respuoda cha quai nu saja per intant il cas causa cha'ls cumüns chi sun commembers da la CCC OEE nu saran dal tuot ils glistess cumüns chi saran commembers da l'EE. I pudess però dvantar üna jada il cas cha'ls commembers d'ün'organisaziun füssan identics culs commembers da tschell'organisaziun. Lura füssa dad ir sur ils cudeschs e verer schi's pudess unir las duos organisaziuns.

Ün oter votant dubita cha l'andamaint cumünaivel saja per finir plü bunmarchà. Ch'el haja fin uossa pudü constattar cha cun far consorzis s'hajan ils cuosts suvent augmentats e na sbassats.

Singuls votants as fan pissers cha l'EE possa in avegnir far tuot las lavurs sainza stuvair concuorrer cun otras firmas. Not Carl spiega cha las lavurs da mantegnimaint vi da l'infrastructura electrica gnaran effectivmaing fattas da l'aign'organisaziun causa cha quai saja pels proprietaris il plü favuraivel. Lavurs plü grondas gnaran però scrittas oura.

Sün dumonda our dal ravuogl da radunanza chi chi saja respunsabel per spostamaints da lingias e per l'iglüminaziun da cumün e chi chi possa inchaschar las taxas d'attach respuoda Not Carl cha tant il spostamaint da lingias sco eir l'inchasch da las taxas d'attach vegnan surtuts da l'EE. L'iglüminaziun cumünala resta però pro'ls cumüns e nu vain integrada illa società.

Ün votant drizza l'intimaziun a Not Carl ch'eir scha'ls fits d'aua hajan portà bainschi blers raps als cumüns, nu saja il möd tschernü da seis temp per calcular ils fits d'aua dal tuot güst, uschè chi füss ura e temp da tscherchar ün otra clav da scumpart. Not Carl piglia incunter l'intimaziun e conferma cha quist tema detta adüna darcheu andit a discussiuns.

Il capo ingrazcha per l'intimada discussiun e declera cha'l Cussagl cumünal propuona a la radunanza d'entrar illa società EE e da suottametter la ledscha ed il reglamaint correspundent a la cumünanza d'urna. La radunanza segua illa votumaziun averta unanim a la proposta dal Cussagl cumünal. La fatschenda vain suottamissa a la cumünanza d'urna als 17 gün 2012 in occasiun da las votumaziuns federalas.

2

ORIENTAZIUNS

Demischiun CCC OEE

Il capo orientescha cha Otto Augustin haja dat sia demischiun da la giunta da la CCC OEE illa quala el ha tut part passa vainch ons ed ha prestà, per part eir sco vicepresidente, fich bler a bôn da nos cumün. Il capo ingrazcha ad Otto Augustin per seis grond ingaschamaint.

Fossa per urnas cumünaivla

La scheffa da sunteri orientescha chi saja uossa in vigur la fossa cumünaivla per urnas. A man d'alchünas fotografias muossa ella co cha quista fossa guard'oura e co ch'ella funcziuna. Tenor sias spiegaziuns vain la tschendra svödada our da l'urna illa fossa cumünaivla. Sün giavüsch as po francar vi dal crap da la fossa üna tablina cul nom dal trappassà o da la trapassada. La scheffa da sunteri ingrazcha in quist lö a Gian Andri Albertini per la skizza ed a Jon Andri Schmidt per la construcziun da l'ouvra d'art in fuorma d'üna föglia chi imbellischa la fossa.

3

VARIA

Suot la tractanda "varia" aintra la propsta da xxxxxxxxxxxx da rimplazzar il bügl da Schigliana ch'id es in ün nosch stadi cul bügl renovà da Vidos. Implü spostess el eir il bügl da Sagliana e til mettes süsom il chant da Sala ingiò cha las vias as spartan vers Vidos o vers Pradè. Il schef respunsabel declera chi füss stat previs da sanar il bügl da Schigliana amo quist on, ma causa chi s'ha stuvü scurznr il büdschet es il proget gnü mis inavò sül 2013.

In connex cun las sanaziuns dals bügls vain implü fatta la remarcha cha talas lavurs stuvesan gnir realisadas la stà e na l'utuon causa las temperaturas bassas d'ürant la not. Il capo piglia a cogniziun l'intimaziun e conferma sco versà il sector da fabrica cha quella pratcha füss la güsta.

Sün dumonda d'ün votant schi nu's pudess sunar il sain da radunanza plü bod per cha'ls votants füssan punctualmaing preschaints respuonda il caluoster cha quai füss da princip pussibel, ma cha lura füssa da dar a programar intuorn la sunaria e cha quai füss collià cun cuosts.

Ün votant dumonda schi nu füss pussibel da laschar sunar il sain da not pro l'accumpognamaint d'üna bara davent da Stron fin cha la bara es a chasa. Il caluoster respuonda cha quai füss pussibel. El stuves però sunar il sain da not manualmaing e til stuves lura serrar giò tenor l'indicaziun d'ün'ulteriura persuna chi til comunicess per telefonin cur cha la bara es a chasa.

L'anterior capo xxxxxxxxxxxx declera ch'el vaiva vairamaing confermà illa radunanza dals 12 avrigl 2012 ch'el accepta la correctura formulada dal schef da fabrica xxxxxxxxxxxx. Davò la discussiun sur dal tema in sia famiglia giavüscha el però cha las votantas ed ils votants piglian a cogniziun il fat cha l'anterior Cussagl cumünal e cun quai eir el sco capo hajan fat sbagls cun dar il permiss da fabrica pel fabricat da sia figlia in Plaz, però sainza cha quai vess manà alch profit persunal per el o per sia famiglia.

Il capo dà il pled al president da la cumischiun sindicatoria chi vaiva da seis temp fat tscherts sclerimaints illa fatschenda. Il president da la cumischiun sindicatoria declera ch'els vaivan comunicà fingià üna jada a la radunanza chi nu saja l'incumbenza da lur cumischiun d'intermediar in quista fatschenda ma ch'el possa confermar in quist lö cha ni xxxxxxxxxxxx, ni sia famiglia nu s'hajan inrichis cun far quists sbagls.

In vista chi nun aintran ulteriurs votums suot la tractanda "varia" serra il capo la radunanza a las 22.00

L'actuara: